

Goran Salihović, predsjednik Općinskog suda Sarajevo

Nisam zaustavio uknjižbu nacionaliziranih stanova

Nemam uvid u pojedinačne predmete • Sud zatrpan tužbama komunalnih preduzeća

Predsjednik Općinskog suda Sarajevo Goran Salihović u razgovoru za "Dnevni avaz" negira optužbe Udruženja građana za zaštitu nosilaca stanarskog prava na nacionaliziranim i privatnim stanovima "Dom" da je zbog pritiska vjerskih zajednica zaustavio uknjižbu tih stanova.

Pritisci "Doma"

- Ja nisam zaustavio uknjižbu nacionaliziranih stanova. Takvu naredbu nema pravo niko dati. Uknjižba se vrši u skladu s Izmenama i dopunama Zakona o prodaji stanova na kojima postoji stanarsko pravo FBiH. Postupak koji referent provodi je nezavisan i ja nemam uvid u pojedinačne predmete - ustvrdio je Salihović.

Napominje da mu nije poznato tumačenje Džemaludina Mutapčića, pomoćnika federalnog ministra pravde, na koje se poziva Udruženje "Dom".

- Ne znam šta sadrži taj dokument. No, tumačenje nije osnov za donošenje odluke. Referent se po procjeni može, a i ne mora, poslužiti tim tumačenjem. Optužbe "Doma" tumačim kao pritisak, jer neko mora biti kriv za nešto. Svi predmeti će biti riješeni, ali mora postojati neki red



Salihović: Milion neobrađenih predmeta

(Foto: B. Nizic)

- kazao je Salihović.

Na pitanje da li je tačno da se uknjižba nacionaliziranih i zamjenskih stanova mora vršiti istovremeno, odgovorio je:

- Ja to ne znam. O tome mogu govoriti samo ako ja uzmem predmet. Naravno, odluka koja bude donesena po bilo kojem predmetu, u slučaju da je neko nezadovoljan, može se korigirati žalbom - naglasio je Salihović.

Prema njegovim riječima, sud

je suočen i s drugim problemima, jer ima oko milion neobrađenih predmeta. Od tog broja, 800.000 su tužbe komunalnih preduzeća.

Ažurna obrada

- Čitav pravosudni sistem opterećen je ovakvim predmetima. Planirali smo 15. juna formirati dva odjeljenja, koja bi preuzela rješavanje ovih predmeta - kaže Salihović.

Ističe da je najviše problema bilo u Zemljišnoknjižnom odjeljenju, koje je imalo neriješene predmete po osam godina te da su građani na rješenja o vlasništvu nad nekretninama čekali i po pet godina, ali da je danas stanje mnogo bolje.

- Zemljišnoknjižno odjeljenje je prošle godine obradilo više od 54.000 predmeta. U ovom momentu obradujemo zahtjeve iz februara 2007., te se na uknjižbu čeka 30 dana - izjavio je Salihović.

A. DEDAČIĆ

Prijetili su mi smrću!

Kako kaže Salihović, pred sudom više nema švercera koji su za stotinu maraka prodavali broj za grunt.

- Iz tog razloga smo podnijeli krivične prijave, podigli optužnice, te su mi iz tog razloga prijetili da će me ubiti.

Suspendirali smo i neke naše službenike iz Zemljišnoknjižnog odjeljenja koji su bili korumpirani, te smo protiv njih pokrenuli krivične postupke. U ovom odjeljenju više nema korupcije - naveo je Salihović.